



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10



Minister Fawad-i PM  
Khan pusema jembi



Serena Williams Tokyo  
Olympics nung masayatsü


VOL. XVIII NO. 254 (ADOK 254) DIMAPUR

TENTONÜ (MONDAY)

AAMI (JUNE) 28, 2021

₹ 5.00

## EU Covid 'Green Pass' nung Covishield maden



**New Delhi, June 27, 2021 (Agencies):** July 1, 2021 nungi European Union semdangtsü atema 'Green Pass' amshiba nung Covishield agirtem madentsü.

European Union linüktemi nisungtem timtem melii mapa mesüra tourism atema senzusenbongtsü atema digital "vaccine passport" agütsütsü tenzüokgo.

Iba immunity passport ajanga nisung ka coronavirus disease (Covid-19) anema vaccine agiogo mesüra tawa virus tendangba nung negative nguogo mesüra Covid-19 agi shirangba sülen temang tashi itshioigo ta asüba kulitem agütsütsü.

Taoba mapag European Union-i Covid-19 vaccine tapu mashi atema kulikakettem agütsütsü ashi, saka tang agütsüba tetuyuba nung 'Green

Pass' nung EU-wide marketing authorization aliba vaccine tem dang asütsü ta shia lir.

European Medicines Agency (EMA)-i EU member state temi amshitsü atema vaccine pezü agizüka lir aser itemji Comirnaty (Pfizer/BioNTech), Moderna, Vaxzervria (AstraZeneca) aser Janssen (Johnson & Johnson) lir.

Pune nung amenoka aliba Serum Institute of India (SII)-i yangluba Covishield ya AstraZeneca Covid vaccine indang tapu ka saka European market atema EMA-i temelaba magütsü lir.

Covishield agirtem ya India nung aser rongsenkettsüng jenjang mejungi aliba linüktem nung alirtem lir. WHO-i teyari agüja inyakba COVAX initiative ajanga tanga linüktem nunga iba vaccine agiogo.

## Anogoshia Covid vaccine indang dose crore kaka agütsütsü

**New Delhi, June 27, 2021 (Agencies):** India nung taruba ita trok nungi ti tsüngda anogoshia nisung crore kaka (1) nem vaccine agütsütsü alizüing ayutsü ta COVID working group chairman, Dr NK Arora-i ashi.

"ICMR-i study asüba osang ka adokogo aser iba nung Covid wara tasembuba menur atongtsü ta shia lir. Anungji linük nung nisung ajak nem vaccine agütsütsü atema ita 6-8 tsüngda mapang lir. Taruba anogotem onoki anogoshia dose crore kaka agütsütsü atema alizüing yur inyaktü" ta Dr NK Arora-i ashi.

Honibarnü Centre-i Supreme Court dang taküm December 31 tashi nung India nung tain ajak nem vaccine agütsütsü atema mapa inyaker ta ashi.

State sorkartem aser nija mozü ki tilatemi vaccine angutsü atema timtem ajurur ta ashiba sülen vaccine alizükba inyaksim melenshiogo ta Centre-isa Supreme Court dang ashi.

India nung arishi küm 18 ser temapur nisung crore 93-94 nem Covid vaccine agütsütsü atema dose crore 186 nungi 188 nungdaksü. July 31 tashi nung dose crore 51.6 yanglutsü, ta Centre-isa metetdaksü.

Taküm August aser December tsüngda Centre-i Covid-19 vaccine balala indang dose crore 135 tashi alizüktsü sentong lir. Iba nung Covishield dose crore 50, Covaxin crore 40, BioE crore 30, Sputnik V vaccine crore 10 aser Zydus Cadila indang DNA vaccine dose crore 5 lir.

## Centre aser state sorkartemi school lapoktsü memelar Tanur indang Covid vaccine ajanga school lapoktettsü: AIIMS Director

**New Delhi, June 27, 2021 (Agencies):** Covid19 wara tanabuba joko tatemleni aruaka Centre aser state sorkartemi school melapoki atatsü telemtetba agiogo.

Mongintemi Covid19 wara tasembuba atongtsü ta asadanga osang nung ajemdaker iba telemtetba agiogo.

Ajisüaka, kaketshirtem, tsüraburtem aser tsürabur teloktemi Covid19 azüokba tesemtem nung school lapokdaksünür.

"Sorkar school nung azünger kaketshir 30% tashi 'school dropouts' lir. Anungji tanurtem atema tesem tajungtibaji school lir" ta All India Parents Association President, Ashok Agarwal-i ashi.

"Mapang talangka school shibangba ajanga lokti nung mapa tamajung aika inyaker aser tanur nem mapa inyakdaksüba, parnok dak tim mesüi kongshiba aser tashidaktem adoker" ta pai metetdaksü.

Lockdown agienba mapang rongsenkettsüng dak sendakba maparen ajak lapokogo anungji school tema lapoktsüla, ta Agarwal-isa ashi.

"Delhi sorkari Covidinyakyim sülen anidaka kaketshir 50%

dendakja school tem tanaben lapoktsüla. Nüngdak dang süra school tem shibangtsü akok" ta paisa ashi.

All India Parents Association-i linük nung school tem lapokdaksünüaka, tsürabur 70% temai pei chirnurtem school-i meyoknür. Ajisüaka, külen tsürabur 30% shi katibo pei chirnurtem school-i yoknür, ta study ajanga ashir.

Külen, Union Education Ministry-i Covid19 wara ajanga school tem lapoktsüba nung kanga kümdangtsü ayongzükter.

### TANURTEMATEMA COVID VACCINEAJANGA SCHOOL LAPOKTETTSÜ:

Tanurtem indang Covid-19 vaccine yanglutetbaji mapa tulu ka inyaktetba asütsü aser iba ajanga school lapokba den parnok atema outdoor inyakyim tenzüktettsü, ta AIIMS Director, Dr Randeep Guleria-i ashi.

Bharat Biotech-i arishi küm 2 nungi 18 tashi atema Covaxin vaccine tendangba September ita tashi nung tembangtsü imlar. Tanurtem indang vaccine ya iba mapang nung jagi angutsü akok" ta pai ashi.

"Iba vaccine ya masüdang Pfizer vaccine-i temelaba ngura,

ibajia tanurtem atema amshitsü akok" ta Dr Guleria-isa ashi.

Zydus Cadila-ia Drugs Controller General of India dang tain aser tanur nem agütsütetba Covid-19 vaccine ZyCoV-D amshitsü atema temelaba meshitsü akok ta sorkar ketdangtsür kati ashi.

Tanurtem Covid-19 agi tera dang shiranger aser kar dakbo shirangba yimya kecha mali, saka parnok dak nungi virus menatsü akoker, ta Dr Guleria-isa metetdaksü.

"Covid-19 wara ajanga tesüiba küm ka ser tasadang tashi kaketshirtemi takoksa ajuruogo. School tem lapoktsüla aser iba nung vaccine ajanga tongtipang shilem agitsü" ta paisa ashi.

"Covid-19 ajanga tanur nem timtem balaka magütsüaka, virus yimya melenshira kanga shirangtsü akok. Anungji iba ama tensa ka atema asenoki renemtsüla" ta Centre sorkari metetdaksüogo.

Tanur dak Covid-19 menaba meyipa reprangshitsü aser inyakyim tasen ajanga wara den raratsü lenmang bushiteptsü atema Centre-i national expert group ka tentetogo.

## COVID-19 Nagaland: Nisung 111 dak putet; 73 taneptsü angu

Particulars	TESTING STATUS							
	RT PCR		Truenat		Rapid Antigen Test		TOTAL	
	Today	Cummulative	Today	Cummulative	Today	Cummulative	Today	Cummulative
Results Received	368	97234	230	61187	745	64450	1343	222871
Positive Results	56	15919	35	4160	20	4882	111	24961

Today's sample positivity rate : 6.20%

**Kohima, June 27, 2021 (TYO):** Deobarnü Nagaland nung nisung 111 dak COVID-19 aliba puteta nisung ajak agi 24,961 kümogo.

"Tanü nisung 111 dak putet. Parnok ya Kohima nung 33, Dimapur nung 21, Tuensang nung 25, Mokochung nung 16, Zunheboto nung 8, Mon nung 5, Peren nung 2 aser Wokha nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Deobarnü COVID-19 puteta alir nisung 73 tashi taneptsü angu. Parnok ya Dimapur nung 36, Mokochung nung 14, Peren nung 12, Kohima nung 7, Tuensang nung 3 aser Wokha

nung 1 lir" ta paisa ashi.

"Tanü taneptsü angurtem züngsema nisung ajak agi 22,251 kümogo aser Nagaland nung taneptsü angurji 89.14% lir. Külen, nisung 1,523 tashi anepaludar," ta Dr Kikon-isa metetdaksü.

Tanü COVID puteta alir tasür shinga maliasü aser yashi tashi nung nisung 487 süogo saka parnok 14 bo tanga tashidak ajanga asü, ta paisa ashi.

Nagaland nung COVID-19 alitsü akok ta temolung melemba sample 2,22,871 tendangogo. RT-PCR ajanga 97,234, TrueNat ajanga 61,187 aser Rapid Antigen Test ajanga 64,450 tendang, ta Dr Kikon-isa ashi.

Honibar tashi nung nisung 4,09,040 nem COVID-19 vaccine indang dose 4,66,202 agütsüogo, ta State Immunization Officer, Dr Ritu Thurr-i ashi.

"Vaccine agirtemji frontline workers 60,076, healthcare workers 15,791, arishi küm 45 ser temapur 1,46,160 aser arishi küm 18 nungi 44 tsüngda alir 1,87,013 lir" ta paisa ashi.

"Vaccine agirtem rongnungi nisung 57,162-i dose anaprong agiogo. Parnokji frontline workers 28,710, healthcare workers 10,427, arishi küm 45 ser temapur 18,015 aser arishi küm 18 nungi 44 tsüngda alir 10 lir," ta Dr Thurr-isa metetdaksü.

Tir Yimiyim

### Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.  
 Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.  
 Pei meyong mobile phone, kumesü aser toothbrush nung ama melentepa tamshi.  
 Mozü achitsü agüja lira, aji shitak chiang.  
 Tango junga mesashitetba, teku ashiba, aketba aser temang metaba timtem lira yakta doctor bushiang.

### Nagaland State BJP ajanga Aienla Jamir nem tetushi agütsü



Mahila Morcha indang National Secretary inyaksü shimokla, Aienla Jamir nem Dimapur nung tetushi agütsüba sentong nung tangokba yangi noksa nung angur.

**Dimapur, Aami/June 27 (TYO):** Nagaland State BJP ajanga tawa Mahila Morcha indang National Secretary inyaksü shimokla, Aienla Jamir nem Dimapur nung tetushi agüja liasü.

Aienla Jamir ya taoba mapang State BJP Disciplinary Action Committee nung züngsem, Core Committee nung züngsem aser Phek District indang Co-Incharge liasü, aser la ya Mahila Morcha indang National Secretary shimtet, ta State Media Cell, BJP Nagaland ajanga sangdong ka nung ashi.

National level nung Nagaland state nungi aniokba tetsür la ya mezüng alitsü aser National Mahila Morcha tang kümsük nung North Eastern state ajunga nungi tetsür la kisüng alitsü.

La nem iba menden

agütsüba ajanga party sentong aser senden ajak nung la ya Ex-Officio züngsem ka ama amuker.

Aienla Jamir ya BJP züngsem ka ama 1998 küm tenüng zülüok aser tanü tashi danga political party kecha nunga medeni arur.

Aienla Jamir-i iba ama jenjang tulu ngutetba atema tenüngsang aser tetushi agütsütsü atema Nagaland BJP tir aser Minister, Temjen Imna Along aser ketdangpurtemi Dimapur nung lar kidangi oa la ajurua liasü.

La National jenjang nung Nagaland State BJP nungi Mahila Secretary ka ama shimtetba ya BJP Nagaland asoshi tejak tentetba mapang ka lir, ta Nagaland State BJP tir-i ashi.

"Nü mapa ya Nagaland nung kisüng masü saka North

East ajunga atema alitsü. Aser BJP Nagaland ajanga na teti nungittsü," ta Minister Imna Along-i ashi.

La National jenjang nung mapa inyakba mapang Nagaland State BJP tajunglen nungi rangloktsü aser Delhi nung aliba lenirtem dang PDA sorkari kümsük tembanga inyaksü ta osang sangokjang, ta paisa ashi.

"Centre nungi totuyuba agütsü tashi BJP-i alliance den nokdaksü," ta Imna Along-i ashi.

Nagaland BJP tir aser ketdangpurtemi la semdangba atema pelaba lemsatepba mapang, Aienla Jamir-ia BJP tejakleni anir aotsü atema tajungtiba agi inyaksü, ta ashi.

"Mahila Morcha, talisa Nagaland nung aliba ya tangbo kü tebilemtsü kumogo," ta lai ashi aser State BJP maneni nungittsü, ta ashi.

### Assam Rifles temi Phek nung COVID-19 vaccination drive ayongzük

**Dimapur, Aami/June 27 (TYO):** HQ IGAR (North) kübok Assam Rifles, Phek Battalion ajanga June 27, 2021 nü Phek jila nung COVID-19 vaccination cum awareness sentong ka ayongzuka liasü.

Iba sentong ya Deputy Commissioner, Phek,

Razouvolie Dozo aser Phek Battalion nungi medical team lenisüba kübok agia liasü. Assam Rifles, Phek Battalion ajanga civil medical team nung süngojemtsüa dena anepaluja liasü.

Iba mapang arishi küm 18-44 tsüngta alir nisung 191 aser arishi küm 45 nungi tema

nisung 37 nem COVID-19 mozü agüja liasü. Kasa mapang nisung ka COVID-19 dose tanabuba agia liasü.

Iba ama sentong tajung takok ngua ayongzükba atema district administration aser medical team ajanga Assam Rifles, Phek Battalion dang pelaba lemsatepa liasü.

### Nagaland Adventure Club-i teyari agütsü



**Dimapur, Aami/June 27 (TYO):** Asenok COVID-19 tashidak wara tamajung agi tesem ajungalen müketbanger aliba mapang doctor aser healthcare nung inyaker temi maneni asenok asoshi iba virus anema nokdaker. Parnoki iba tongpang tulu raraba mapang lenmang balala nung nüburttem teyari nüngdaker.

Yamaji doctor temi anir healthcare nung inyaker tem dang tepela temaitsü sayua, Nagaland Adventure Club (NAC) ajanga Naga Hospital Authority Kohima (NHAK) aser Dimapur District Hospital nung inyaker nem chiyongtsü aser aonsotsü tem agüja liasü. NAC yagi Wokha, Zunheboto aser Phek district

tema semdanga yangji COVID Care Centre pezü nem mozü, PPE kits aser senotsü teyari agütsü aser healthcare nung inyaker den sensaksema liasü, ta sangdong ka ajanga ashi.

Iba maparen nung yariteper ajak dang Nagaland Adventure Club ajanga pelar, ta sangdong ajangasa ashi.

### Karbi Anglong police-i nisung pezü den temesepba mozü apu

**Diphu, Aami/June 27 (Agencies):** Karbi Anglong Police ajanga June 27, 2021 nü Anti-Narcotic Drugs & Psychotropic Substances (NDPS) operation ka agia liasü aser iba mapang tesem ana nungi nisung pezü apu aser nokdanga aliba NDP oset nguteta liasü, ta osang ka ajanga ashi.

It dangiter osang ka nung ajemdaker John Das, SDPO, Bokajan Subdivision ajanga OC Khatkhathi, Mwbluk Brahma, SI, Charan Mohan Chetia aser staff tem teyari nung Deobarnep 5:00 ako meta Gandhi Garage jakdang mita bushiba mapang Heroin südi ta temolung melemteti aiba oset tuozük gram 36 aliba sapon asepa case asem nguteta liasü.

Iba dak sendakba nung nisung ana den gari tetsüng ter aliba truck (registration No MN-01/9685) ka den nisung ana pua liasü. Temesepba miim mozü shibelener ana ya Lamsang

Police station, Imphal West, Manipur kübok Singda yimtsüng nung alir Asür Chandra Singh'er jabaso arishi küm 36 taon Naoba Singh aser Lamsang Police station, Imphal West, Manipur kübok Phaeng yimtsüng nung alir Bobby Singh'er jabaso arishi küm 29 tain Mangijao Singh ta jangjatetogo.

Iba den külemi police temi ano nisung ana apu aser tena ket nungi Cannabis Ganja südi ta temolung melemteti polythene talep pezü nung oset tuozük seret 20.760 nguteta liasü.

Laharijan PP jakdang Manujjal Gogoi, IC, Laharijan PP ajanga NAKA checking amenokba mapang police temi truck ka (registration No AS-01KC/9163) Deobarnep 6:00 ako meta soita mita bushiba mapang Cannabis Ganja südi ta temolung melemteti aliba oset ya nguteta liasü, ta osang ajanga ashi.



Suruhuto Block, Zunheboto district kübok Phuye Old aser Tichipami yimtsüng nung temsüa alir ajak COVID-19 mozü agiogo. Yimtsüng nung alir noklang nung noklang shilem COVID-19 mozü agütsü atema GB, yimten yimsüsür aser tantsü-tambu tem temolungtetba tulu liasü. Yamaji Dr. Abolu Yeptho, MO Suruhuto PHC lenisüba kübok medical staff temi yimtsüng ana ya June 24 aser June 25, 2021 anogotem semdanga mozü ya agütsü. Phuye Old nung nisung 194 aser Tichipami yimtsüng nung nisung 301 nem COVID-19 mozü agüja liasü.

### New Pangsha kitsük-kirong lendong nung AR ajanga yaritep

**Dimapur, Aami/June 27 (TYO):** HQ IGAR (North) kübok Assam Rifles, Shamator Battalion ajanga Noklak district kübok New Pangsha nung June 26, 2021 nü kitsük-kirong lendong nung yaritepa liasü.

Iba lendong atalokba angashiba den külemi Dan nung

alima Assam Rifles temi yimdaklirtem den yaritepa mi ya remsepa liasü.

Assam Rifles temi mapang shidak nung teyari agütsüba ajanga mi talila kaoloka aoba aser nisung takum samaba mesüra ki-o-jen raksaba nungi nokdangtet.

### Indo-Bangla arrtsü nung taila sen shibelener ka apu

**Guwahati, Aami/June 27 (Agencies):** Ozüng alema shibelenba anema nokdakba nung maneni takok nguteta, Guwahati Frontier of Border Security Force kübok 67 Bn BSF ajanga Dhubri district, Assam kübok arrtsüla Baladova nung June 26, 2021 nü Bangladesh nunger FICN shibelener ka pua pa ket nungi sen 49,500 indang Fake Indian Currency Notes (FICN) nguteta liasü.

Osang kar angazükba nung ajemdaker 67 Bn BSF indang

Border outpost (BOP) Tistapara nung aliba BSF sepaitemi India aser Bangladesh arrtsü anasa aliba Baladova yimtsüng nung operaton ka agia liasü.

Iba mapang parnoki taila sen shibelener Bangladesh nunger ka den pe ket nungi sen 49,500 taila nguteta liasü, koba Bangladesh nungi India-i bener aittsü meranga lia apu.

Iba operation nung apusang aser pa ket nungi ngutetba taila sen ya Dhubri (Assam) Police Station nem agütsüogo.

## Meghalaya: Nagmati atur tasembuba mang temai bener adokogo



Meghalaya kübok East Jaintia Hills district nung nakmati atur ka indang tasü mang ngua agitetba sülen tangokba noksa angur. Iba nisung ya North Tripura kübok Darjeeling Para nungi Shyam Charan Debbarma liasü ta jangjaogo.

**Shillong, June 27, 2021**

(Agencies): Meghalaya kübok East Jaintia Hills nung ozü ng a lema nakmati atudak nungi tasü mang tasembuba bener adokogo aser iba tasü mang jangjaogo.

Tasembuba tasü mangji Shyam Charan Debbarma aser pa ya North Tripura kübok Darjeeling Para nungi liasü ta jangjaogo.

May 30, 2021 nü dynamite ka apokba sülen nakmati atur nisung pungo tashi anebanga liasü.

Indian Navy diver temi Hokolbarnü tzü metsü ng banger aliba mine nungi tasü mangji agiteta liasü.

Parnoki June 16 nü mezü ng tasü mang agitet aser mang tanabuba ji June 24 nü agiteta liasü.

Tasü mang anaji Cachar district kübok Najatpur tesem nungi Anowarul Islam aser Karimganj district kübok Pimhajang nungi Abdul Sukur na liasü ta jangjaogo.

Meghalaya indang Disaster Response Force, police, Indian

Navy aser National Disaster Response Force telok tem iba tesem nung lendong atalokli nungi par pungo kü mzü ktsü asoshi maparen achaayanga arudar.

Iba tesem nung tzü ng lu sashia aruba yong sendaktepa aliba mine tem tzü mobanga atuba ajanga tekü mzü kertem kanga timtema inyakogo.

Hokolbarnü tasü mang tasembuba agitetba sülen nakmati atuba tesem den sendaktepa aliba tesem ana nungi tzü atsü dok tenzü kogo.

## BRO-i Arunachal nunger dang tatok meshir

**Itanagar, June 27, 2021**

(Agencies): Honibarnü Border Roads Organization (BRO)-i Arunachal nunger dang Kimin tenü ng Assam nung "Bilgarh" ta melenshiba atema tatok meshiogo.

Defence Minister Rajnath Singh-i Kimin nung lenmangtem lapoktsü tsü atema arudang BRO-i Arunachal ta aliba signboard nü banga liasü.

"Ni Arunachal Pradesh nunger dang tatok meshir. Onoki kechi aibelenogo ibaji metetsü monga masü. Onok state nung alirtem jashidaktsü tsü tebilemba kecha mali" ta Additional Director General of Border Roads (ADGBR-East), PK Singh-i metetdaksü.

"Iba sentong agitsü atema

kanga dang aritepa inyakdang aibelena inyaksemogo. BRO-i Arunachal Pradesh nunger temolung yirutsü tsü atema tebilemba kecha mali" ta Singh-isa ashi.

"Iba sentong ya Kurung Kumey district kübok Huri nung agitsü ba liasü saka tzü ng lu aruba ajanga lendenlen agitsü belena liasü" ta paisa ashi.

June 15 nü pai tesem semdangdang ashishitep kecha malitsü atema signboard ana ayutsü ba ashi. Ka helipad nung aser ka ITBP campus indang kishi nung ayutsü, ta ADGBR (East)-isa metetdaksü.

Arunachal Pradesh DGP dang board indang ayutsü ashidang pai ADG (East) dang iba tesem nung alirtem

tangatetba ashi aser board ayutsü ba memolungba den yua aliba kecha memelenshi ashi.

DGP-i ashiba nung ajemdaker June 15 nü kecha memelenshi tsü lemtet. Anungji kechi atalok ibaji meteta inyakba masü, ta ADGBR (East)-isa ashi.

Centre mesü ra state sorkar nungi Kimin ya Assam nung 'Bilgarh' ta tenü ng melentsü atema tetuyuba kecha maliasü. Kü len, iba tesem nung Google map nunga teratatsü keta lir, ta paisa metetdaksü.

"BRO-i state nung terenlok bener arutsü atema bendanga agü ja inyaker aser nü bortem den kü lemi terenlok aser azü karu bener arutsü amanger" ta ADGBR (East), PK Singh-isa ashi.

## Meghalaya nung Covid-19 puteter shilem 90 tema 'Delta variant' lir

**Shillong, June 27, 2021**

(Agencies): Meghalaya nung Covid-19 putetba shilem 90% tema Delta variant (variant of concern) lir, ta state sorkari metetdaksü ogo.

"Meghalaya nung putetba Covid-19 shilem 90% dak tema 'genome-sequencing samples' ajanga 'Delta variant' aketba sayuogo. Nisungtem aser pei apuani kü mzü ka ayutsü atema item variant alirtem tali kü mdangshitsü la" ta Health & Family Welfare department, principal secretary, Sampath Kumar-i ashi.

Meghalaya nung COVID-19 elta Plus variant putetba dak sendakba nung sorkari ochiba miimbanger ama osangkaket nung adokba sü len anogo ishika lir Meghalaya sorkari iba osang ashi.

Meghalaya Health Department-i district tem nung DC ajak dangi yokba shidi ka nung ajemdaker tesü iba anogo ishika jakdang osangkaket nung Meghalaya nung COVID-19 Delta Plus variant putetba dak sendakba nung state sorkari ochi osang miimbanger amabilemer ta shia liasü.

District ajak nung Deputy Commissioner dangi

Meghalaya Health Department ajanga züluba shidi nung, State nung COVID-19 puteta alirtem dak "Variant of Concern" (Delta Plus variant) aliba ngutetogo, ta shia liasü.

Tawa, Centre-i iba COVID-19 Delta Plus variant ya "tebilem tsü aketba variant ka" ta sangdongogo.

June 3, 2021 nü Principal Secretary (Health), Sampath Kumar-i State nung District ajak indang DC dangi züluba shidi nung Meghalaya nung COVID-19 Delta Plus variant putetba ashi.

Sampath Kumar-isa ashiba agi, State nung Covid-19 puteter timba kü ma aoba asadangteta Vaccination drive tem tekaraba nung achaayanga agitsü asoshi state sorkari meranga inyakdar.

"Covid-19 wave tasembuba adoktsü asadangteta nü burtem iba nungi kü mzü ka ayutsü asoshi tebilem tsü akatsü la aser nü ngdakba tongtibang maparentem ajiteta inyaktsü la" ta shidi nungsa shia liasü.

"Health tetuyubatem nung anidaka kati ka asoshi bilem tsü tsü la aser aji kija shia atema khuret asü tsü la" ta Kumar-isa metetdaksü.

## Lakhimpur nungi Shiva Rani Kalita-i Best Actress Award angu



**Guwahati, June 26, 2021**

(Agencies): Canada nung agiba Ottawa Indian International Film Festival sentong nung Shiva Rani Kalita-i Best Actress Award takok anguba ajanga State aser linük nem tenü ng tajung bentsür aruogo.

Arishi kü m 22 tain Kalita ya Lakhimpur district nung Baligaon yim nungi lir. Kripal Kalita-i direct asü ba Assamese film 'Bridge' nung Rani Kalita-i shilem tajung agiba atema lai iba sempet angu.

Shiva Rani ya North Lakhimpur kü bok departmental store ka nung inyaker aser lai iba osang angashia pelaba metetdaksü.

"Ni film nung mezü ng shilem agia liasü aser iba maparen nung takok ngua inyaktetba atema pelar" ta Shiva Rani-i ashi.

Iba movie nung lai takok anguba atema Shiva-i lar adianu

aser medemertem dang pelaba metetdaksü.

"Jilushi balala nung ni shilem agia aru asü nung actress ka akü m tsü kü mangdang liasü aser ni BSc azü ngba mapang 'Bridge' nung shilem agitsü maongka angu" ta Shiva Rani-i ashi.

Assam nungi actress tejen Seema Biswas-i Malayalam movie 'Idam' nung shilem tajung agiba atema 2019 kü m Ottawa Indian Film Festival nung lai kasa award agizü kogo.

Film festival 28 tashi nung 'Bridge' film ajanga tenü ng tajung nguogo.

Takü m January ita Goa nung ayonga agiba India International Film Festival nunga Indian Panorama category nung iba film ajanga Jury's Special Mention Award angu.

'Bridge' film ajanga Assam nung tzü metsü ng dang tetsür ka timtemba otsü ashir.



Deobarnü Meghalaya transport minister Sniawbhalang Dhar-i Guwahati nung Assam chief minister Dr Himanta Biswa Sarma den ajurutepdang agiba noksa angur. Iba senden nung Dhar aser Sarma nati state ana dak sendakba onüktem benoka lemsatap. (Guwahati, June 27)



## TIR YIMYIM YIMOBILEM (EDITORIAL)

DIMAPUR TENTONÜ, AAMI (JUNE) 28, 2021

### Taküm tasen yangludak

**A**lima ajunga nung mozü mora achiba aser shibelenba nokdangba anogomong küm shia June 26 nü amongba den külemi asen lima nunga tesem kar nungbo iba sentong ya agia mongogo. Iba anogomong nung ozüngi memelaba mozümora shibelenba ayokba aser achiba indang teblemstü indang jembir aser item ozüngi memelaba mapatemji nokdangtsü asoshi shisalemsateper. Atangji, asen lima nunga mozü mora achiba wara yagi jala jabaso aika taküm samaogo aser aika taküm lemdaogo aser ano aika timtem shisabolu nung lir. Joko, mozü chiachia mozü lar kümer mozü machibo taküm junga melitetsüsa akümbaji lokti asoshi timtem dang masü saka mozü achir asoshia tashidak amai kümadoker, kechiyong mozü larji mozü achi nung dang nüchi küma arur. Tanüa kibong aika nung tsürabur aser kinungtsütem pei jala jabasotem aser kinungbo kidangi meyipa maru tashibo temulunga animesüngzüktet amuia moutet, chia mechiyongtet shisabolu tia nung lir. Asen lima nung, balaka, asenok ajak sensakertem dang asünungji, mozümora achirtemji mozüa malitet auer küma aoer. Iba jagi mozümora achir alidakbo kidanga chipo anpoa dena ayu majung amzüker. Aji oda, yimeryimsanger kidang aser alu nunga tagitarutsübo kecha ayu majung aser tsünüa majung amzükdaktsür. Iba jagi aiben mozü ayoker aser achirtem pua yimteni dena merenshir. Mapang kabo asen lima tesem aika nung mozümora achirtem kangshia azüoktsü atema shiki dena yanglur merenshiba mapang liasü. Atangji, tamzük maremba agi temerenshi tulu agüja mozümora achirtem azüoktsü asoshi yimteni yamaji inyak, saka iba jagi mozümora achir tsürabur aser kinungertem dang tali sentsü tsüa shisaboludaktsüba dang ashi, mozü mora achirtem taküm tajungba küma melenshibabo mali asü. Ashiko, tanü asung ya mozümora achir maliba agi masü saka shiki nung puoka ayuba tajanzük maliba agi shiki nung ayuba inyakyim to agien asütsüa akok, kechiyong mozü tapu balala melentepa achir dang ashi mozümora achirtembo lir. Atangji, yimten asünungji ozüng raksar aser tashi mangartem dang merenshitsuabaji tim dang, saka mozümora ayokba aser achiba mapa ya temerenshi agütsüba kisung agi makoker, anungji yimteni merenshiaka lokti aser arogo tsütsü nungi temeim agi nisung taküm raksaa oa alibaji tanaben taküm tasen küma shia arudaktsütsüba kanga süoki ia bilema inyaktsüla. Aji oda, tanü asen loktiliba nung machimajemtsü achiba aser ajemba ajanga teblemstü bener aruba timtem ya nokdangtsü aser anendaktsütsü asoshi mozümora aser yi ayoker aser achijemer kisung mitba aser merenshiba agi majungtsü saka iba teblemstü tenzükba dera ya asenok kibong shia nung tsüraburtemi, arogo aser lokti shia nung lenirtemi kanga junga bushidangtsüla. Ashiko, mozümora achirtem aika kidang tesünep nung maliba agi aser tepela manguba agi tejenokdak ka bushidang mozü aser yi dak jenoktsüsa aküm asütsüa akok, mesüra kidang aser arogo nung tesayuba aser sarasadem agi anungba ajanga alima pelatepdak tatidang mekoktet mozü aser yi lar küma aoba asütsüa akok. Kodang asenoki item tetenzükdak moktenji jungjunga repringdangdir, ashiko, mozü achir aser yi ajemertemji masü asen tai ajanga tenzükba teblemstüang asütsü akok. Aji oda, government tsütsü ozüng agi inyaktsü purtemia pei lima meima aser ita sen agi langa jungjunga inyaktsüla aser iba denji tsüraburtemi anir lokti aser arogoi iba tongpang nung sarasadema nübo aser rongsen agüja inyaktsüabaji, ano, tangsa tenungdakba repringtetter. Atangji asen lima nunga ABAM-i anir talisa arogotemi iba mozümora aser yi lartem taküm tasen küma yanglutsütsü asoshi sentong tapu balala agia aoba angur. Item rongnung takok ngua aoba tesem kaji, Tuli nung yangji temeket arogotemi longjemer lapokba Grace Home nung nisung aika taküm tasen küma yanglushitsüba osang angashir. Item arogotemi inyakbaji Tsüngremia pelaa repringa alitsü südi. Iba ama mapaji ajizüka, ano tanga tesemtem nunga arogotem longjemer inyaktsü ajungshir. Item ama tesem nung amongertemji taküm tajungba küma melenshidakja amongdangji, ano teka mapa dena angazüker aotsüsa kasa tesemji Skill Learning & Development Centre küma lapokra, chia ajemertem ajakji mapang tatsüka tsüngda mapa inyaker kaka küma pei kibong dang masü saka pei arogo, lokti aser yimten yarir nisung tajung kaka kümadoktsü. Iba ama sentong nung ya asenok arogoi rongsen mekurui endoktsüla, kechiyong nisung taküm ka tasen küma yanglutsüba mapaji rongsen endokba mapa masü saka rongsen renlokba mapa lir.

## OLEMSABANG

### TSÜNGREM MALI

- Maong Jamir

Naga nunger lanur tajung ka liasü. Pa kanga dang tokolok techira aser jembishinü aser awashi temetet liasü. Interview ka nung pa koba Arogo nung adener aser Arogo nung tesentaktep koba tashi ta asüngdangdang pai yamai langzü "Ni atheist" tetezü 'ni Tsüngrem dak mamanger' mesüra 'Tsüngrem mali'.

Iba asangur kotasür Tsüngrem dak mamangi aküm, iba indang bushi dang, aser pa iba tangatetba nung aliba ya pa tai masü ta ajitet.

Pa ya kidong chir ka liasü. Par tsürabur kidong aliba asünung Arogo nungi endok, aser taküm tepiyong Arogo nung medeni kibong lia aru. Tena sentepi maobaji dang masü saka tanurtema sentepi aotsü asoshi tasü ita tenati majungshitet. Tanurtem tain akümdang medermertemisa ajungshia sentepi anir ao. Saka lia arudang parnok dak sempet tajung liaka Arogo nung aiben parnokji ashishia amshi.

Arogo aser nüburtemi mezüngokba ajanga pa taküm nung tepela mangu aser tanem tanemi iba asangur ya Arogo aser Tsüngrem nungi talangka atsüngzüka ao. Pai taküm nung tepela angutsü lemanng aika nungi bushi saka mungutet. Pa iba ama jenjang nung alidang University ka nung par tesayur 'Atheist' ka pai ajuru. Iba tesayur ya tamasabo Khristan ka liasü.

Iba tesayuri pa den mena jembi aser Tsüngrem mali ta tesayuba jagi ajang ajanga agütsü. Ibaji dang masü saka iba tesayuri pa dang kanga meim aser lemanng aika nung teyari sayu. Asenok taküm nung timtim jenjang nung alidang shibai asen den temba ayimer aser yariteper parnokji Tsüngrem ama bilemer aser parnok dak temulung adoker. Yamaji Tsüngrem mali ta tesayuba agütsübai pa koktetdaktsü aser tanü tashi iba asangur iba tangatetba nung lir. Ashiko pa dang Tsüngrem ka lira aser Tsüngrem temiemji yamai ta taküm yimya aser tesayuba tajung agütsür lilasang aser lokti aser Arogo nung pa mesentoki amshi asübo pa iba nungjagi mepelai lila. Saka pa taküm nung tepela angutsü lenmang kecha mali aser pai yimlaa aliba lokti aser Arogoia pa sendok; iba yongji pa tepela angutsü asoshi lemanng bushi aser pai ngutet. Süra san 99 rongnung samar alibaji pa ya masü na?

Yohan 8:1-11 nung tetsür ka nüktapangtaa aliba apu aser Yisu anasa anir arua ozüng nung aliba ama la long agi onseta südaktsütsü ta ashi. Iba Anogo nungji la asoshi pusemerji Yisu dang liasü. Iba anogoji Yisu mali asübo la ozüng nung aliba ama long agi onseta südaktsür lila, Saka Yisui la maitsü. Yisu asoshi tai aser temenen seret ajak saku liasü. Tanü Arogoji Yisu melen nokdaker masü no? Iba mapang nung, iba anogo nung, iba tensa nung Khristar Arogo maliasübo mesüra Tsüngrem tenzükersangto maliasübo kechi kümer lila ta ashiba otsü karbo lir mali?

#### Tangatetsü

- \* Tsüraburi masüngteti kibalenboba ajanga tanur timtem jenjangi idaktsür. Anungji lanurtem dang sobaliba tesayuba tajung agütsütsüla.
- \* Arogoi parnok tanela anir arutsü mokoktetba ajanga, 'Tsüngrem mali' ta tesayuba agi parnok koktetdaktsü. Yimden aser sobaliba magizükaka Arogoibo parnok tanela asoshi aria bilemstütsü aser mesentoktsüla ta bilemer.

#### Lai tesayuba

Mati. 18:12-14 "Nenoki koda bilemer? Nisung ka san noklang ka kara, aser item rongnung ka mashileni ora, pai tukor tukojitoktsür mashileni aoba san kaji bushitsü tenemi maor ama? Aser pai aji ngura, ni nenok dang züngpong ashir, mashi mejajaba tukor tuko dang nungibo iba dang pai tali pelar. Anungji item tilatem rongnung ka danga samatsü kotak nung aliba nenok Tebui memulunger.

J. Adok 3:2 "Na saksalemang, aser tanungba kechisa tasü lir, itemji akangdakjang; kechiyong kü Tsüngrem madang ne mapa tabensa akümba ni kecha mangu".

T. Ken 14:1 Suwari pei mulung nung ashir, "Tsüngrem mali." Parnokji teraksa, parnok mapaji tesempatsü lir; aser parnok rongnung tajung inyaker shinga mali.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Pakistan nung Arogoi Ministry of Minority Affairs akhanger

**June 27, 2021:** Pakistan linük nung Arogo lenirtemi sorkar dang Ministry of Minority Affairs tentettsüla ta takhangba agütsüogo, ta International Christian Concern (ICC)-i metetdaksü.

Osangbener den jembidang Islamabad-Rawalpindi nung tongti putir, Joseph Arshad-i, "Taoba mapang nung ministry for minorities liasü aser iba ministry-i mapa tajung inyaka liasü. Tangbo

Minorities dak sendakba tebilemstü onüktem Ministry of Religion Affairs and Interfaith Harmony-i dang repranger, saka iba ministry yagi yimsü dak sendakba

2008 küm Khristan, Shahbaz Bhatti leniba nung Ministry for Minorities tenteta liasü saka Bhatti-i Asia Bibi pusemba aser linük nung Tsüngrem mezügmeshiba ozüngtem anema ola adokba

## Cyprus nung Laishiba belenba atema Khristan ka court-i jaok

**June 27, 2021:** Cyprus nung ozüng alema Laishiba aser Khristan kaketem shibelenba atema Hombarnü (June 28) Khristan ka court-i jaokogo.

Taküm January 27 nü police aser custom ketdangsertemi US nungi Khristan, Ryan Keating'er ki den Arogo fellowship ka mita aoba mapang nung Laishiba densema Khristan kaketem aika apu.

Ryan-i ozüng alema Tasen Lai, Laishiba aser Khristan kaketem shibelenogo, ta taküm March 31 nü pa aija liasü.

Iskele nung aliba Ryan'er

## India nung Khristantem anema inyakba kakete ka saya

**June 27, 2021:** Butler University, Indianapolis nung professor, Chad Bauman-i India nung Khristantem anema inyakbatem indang kakete ka zülua saya.

Pai züluba kakete 'Anti-Christian Violence in India (Religion and Conflict)' nungji Hindu nungertem timba aliba linük nung akhidang Khristantem aser Hindu nungertem na tsüngda tesendaktep koma liasü, iba indangji shia lir, iba denji külemi tang India nung Khristantem anema inyakba tatalokbatem kanga bulua akümba indang shia lir.

Akhidangbo India nung Khristantem anema inyakba tatalokbatem züngdangteta dang liasü saka tesüiba küm ishika tsüngda Khristantem anema inyakba kanga bulua akümba indang pai shia lir.

2014 küm Narendra Modi leniba nung BJP-i takok ngua Centre nung sorkar akümba sülen linük nung Khristantem anema inyakba kanga bulua kümogo, ta watchdog organizations aikati metetdaksüogo. Modi aser BJP-i Khristantem aser Muslim nungertem sempaba ajanga linük nung reshikangshi kanga bulua akümer aser state aika nung anti-conversion ozüngtem agizüker, ta watchdog organizations-i metetdaksü.

India linük nung religious freedom jenjang tamajungba akümba atema jembiba mapang ka nung Professor Bauman-i züluba kakete sayar.

India nung religious freedom jenjang tamajungba akümba ajanga United States Commission on

onüktem aser Pakistan nung agi 2011 küm kiralongrartemi pa Bhatti tepset.

Tesüiba mapangtem nung Pakistan nung sorkar balala kübok Ministry for Minorities liasü saka tangbo minorities tebilemstü onüktem reprangtsü atema Ministry for Religious Affairs & Interfaith Harmony nem minorities ministry agütsü.

Yaküm May ita nung sorkari National Commission for Minorities tentet aser iba commission nung Arogo lenirtema aika densema lir.

Osangbener den jembidang Center for Social Justice nungi Peter Jacob-i, "National Commission for Minorities nem ano tashi tuluba agütsütsü nüngdak," ta ashi.

Turkish Cypriot ketdangsertem den iba tebilemstü lemsatepogo. Hombarnü ken o angadanga nung yariteptsü atema US ketdangertemi consular assistant ka shimogo.

Iba ken o metembang tashi Ryan-i ainlen mesenzütettsü aser iba ken o nung pa aitsüra senchi tulu achitsü.

Ryan'er medemertemi Ryan aser par kibong atema sarasademjang aser court nung ken o angadanga sülen iba ken o agientsü atema sarasademjang, ta Khristantem dang mepishiogo.

## Mangdang sayuba

~ I. Neken Jamir.

Tsüngremer mangdang tesayuba kü mulungjang nung maneni jemi nung, ni sentsüh makatsü Aor atema, aser alima atema mangdang tesayubatem, iba osang kakete ajanga kuli asür.

2019 September nung alima ajak tzü tanak agi metsüngbang. Iba tzüma nung nisungtem asatepba nanung ola jagi alima ajak asüng. Teküzmükdak bushia nisungtem jenshiba timtemji tesüngmangtsüka tebang agi ashitsü mekoki sayua liasü. Yamaji tanüa alima ajak wara agi timatemer.

2019 December nung alima dangi wara 3 yokogo ta ashi. Aser January 2020 nungi Covid-19 tenzükogo.

16-08-2020 Aonung Khar tenem kolak ajak ya anensa sayu. Aor atema ya nungtuko tenem, Aor tongtibang lenir tokolak kar lendong ajurutsü ta counselor-tembo osang agiteba sarasadema aruogo, yamaji Aor rongnung tulutibai anir Arogo aser Govt. nung tenzükertem dak lendong ajurua arudaki.

16-11-2020 Aonung Aorsa alar teimtibaji kibong shia kaka katitsü aser iba senji tangaleni bener yoktsü ta ashi. Kibong shia nisung kaka leptok nung mesüra kibong shia temoatsü leptoktsü nung takoksa koteka asutsü, Aortem kanga shisadangi aser Tsüngrem dangi meyipdi.

05-02-2021 Alima ajak amang temelem agi nembang aser yipru tulu aru. Alima nung longro ki talang aika chireb, ki aika maka moapu aküm süngdonglidong ajak laoa angu, taküm alima ajak nung lendong tulu aika ataloktsü.

26-02-2021 Arogo nung full time tenzükertem dak aiatai lendong ataloktsü jakaji reprangang ta sayu. Karbo khu renema bener arua yangi asütsü ta sayua liasü. Aikadak ataloka arudaki ano ataloktsü kanga sarasademang.

28-02-2021 Ao lima ajak longbanga tenem süngdong ajak nung temenen army-tem tanak sobutsü tesa sobur bunker yanglua menogo. Temeneni kibong aika amaktsü lanurtem dak teimba inyaktsü.

03-03-2021 Alima nung wara taküm tesashiba alitsü. Iba wara tzümetsüng jagi Mokokchung town Ao lima moshia yimogo tasüba aika sayua liasü.

08-03-2021 Nisung 2 bo peisasa kasetogo, ano nisung 40 pistol agi kasettsü ta shiogo.

09-03-2021 Asen Mokokchung town nunga lendong tulu ajurutsü nisungtem moapu nung merepshia laoa sayua liasü.

05-06-2021 Mokokchung Town-i yokba light supply feeder ajak katir (shut down) tammang dang sayuogo. Mokokchung town atema kanga sarasademdi.

Yer. 2:27 nung ashiba lai oji Aortemi sen dang tebu ajar long dang nai ni poktetdaksü ta ashir. Parnok tejak masü terongdong kü tsütsü shitsür, anungji ni Aor nungi temoatsü agiener. Na timtem mapang pa nem kümzükdakjang ta shiogo.

Aortem kija kibong shia, Arogo lokti ajak kua jeba lumia Tsüngrem mebushira aiatai asütsü ta kuli agütsür.

Yer. 4:14- O Yirusalem, na kümzüktettsü asoshi ne mulungjang temenen nungi shitokang. Kopika ne tamajung tebilembatem ne dak munga alitsü?

Iba lai nung ashiba ama Aortem asen menen nangzuka Tsüngrem dangi odi ta ayongzüker.

**OLONG PAITEP # 5858**

1		2			3		4			5
				6		7				
8										
						9				
			10							
11										12
					13			14		
15										
16								17		

<b>TIPIEN</b>		<b>LANGTSÜNGLEN</b>	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Allia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

**OLONG PAITEP # 5857 TELANGZÜBA**

<b>TIPIEN :</b>		<b>LANGTSÜNGLEN :</b>	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	



**ALOKBAI TANTSÜ WARAKLA KÜLAKOKTSÜR :**

Nikongdang ka Warakla aon asotsü ngashi alii Alokba yok. Anasa aliba dokan shipanger ali nung talangbai oa ngashiji ali. Iba dokan anasa yi jemdak Bar ka liasüji temanglemsü tera agidi sür tua mena alinung aiür tebour tajung ka arua pa anasa amenji jogo tena metettepa, külemi yiji jema kazü. Khenpika lir aiür la jagi par kidang shinga maliar arung ta Alokbai jaokji pelashishia or tena pelatepa kazü. Aoksa Alokbai mapang repringdang nung joko anepdang asem ako liasü. Anungji Alokbai aiür la dangji Pond's powder meshia pa tekapu nungji jungjunga tokloka mezür kidangi shilang.

**Warakla** : Tajung tazüsang, aon nung inoktsü ngashi alii yoknung ya kechi, hü!

**Alokba** : Aya tantsü, dokan talangba nungang ngashiji anguji aji alia bener tarurba peg ka danga jemdi sür menli idakji tobour tajung aiür ka ajurua küna par kidang khi amendang ita menudaktsüato.

**Warakla** : Kwa nü tekapuji. (Waraklai Alokba tekapuji menemdanger ashir)

**Warakla** : Hai yazülongba, teyazü tejembino, yasünga Polokba nür rogo Carrom kaa kazü südito? Ni atongtsü dang Carrom boardji lepsaa indokang ta ashijar.

Lilir : WhatsApp

**AO OSHI ANGAZÜKDAK:**

TANÜ ANGAZÜKTSÜBA OJANG



**Kazü**

(v)mapa meinyaki amongba (leisure time)

\* Mokdangba mapang nisung ajak kidang **kazü**.

**Kazütsü**

(n) tanurtem asayaba oset (toy)

\* China nungertemi **kazütsü** oset tapu aika yanglur.

**NAI-A YA METETTER MA?**

**ALIMA NUNG JENJANG TULU AKETBA PASSPORT KAR:**

(Item passport dak linük timtba semdangtsü tashi lir)

1. Japan (193 destinations)
2. Singapore (192)
3. Germany, South Korea (191)
4. Finland, Italy, Luxembourg, Spain (190)
5. Austria, Denmark (189)
6. France, Ireland, Netherlands, Portugal, Sweden (188)
7. Belgium, New Zealand, Switzerland, United Kingdom, United States (187)
8. Czech Republic, Greece, Malta, Norway (186)
9. Australia, Canada (185)
10. Hungary, Lithuania, Poland, Slovakia (183)

**TANÜBO NAI LANGZÜANG**

Q. IHO (International Hydrographic Organization) nung linük kwika dena lir?

A.95

B.94

C.93

D.92

=====(Taruba adok nung onoki langzütüsü)

**YASHI ADOK TELANGZÜBA: UK**

**SUDOKU # 5899**

**TELANGZÜBA # 58988**

2	7			4	1			8	8	9	5	2	4	6	7	1	3
		8	3		5		1		1	2	3	9	8	7	6	4	5
		3		2		7	4		4	7	6	5	3	1	2	8	9
6	3		8			5	7		7	8	9	1	2	3	5	6	4
9			1			6			3	4	2	8	6	5	1	9	7
1	2			3		8		4	6	5	1	7	9	4	8	3	2
7		1		8	3		6		5	3	4	6	1	2	9	7	8
8		9		6	7	1		2	9	1	7	3	5	8	4	2	6
3						4	8		2	6	8	4	7	9	3	5	1

**OJANG LUTEP # 5443**

NAKONG :

AUTSNGÜ :

ITTASUA :

NZTEÜK :

KASA :

KSÜMA :

UANG :

TENGTSÜMBASA :

NGSENTO :

ATTEONGT :

**OJANG LUTEP TELANGZÜBA # 5442**

KODANG AZÜAPONG BENSITSÜ TENZÜKDIR ASEN DAK NUNGI OCHI PILAA OADOKER

**TAN HOPTA ATEMA - KOMA SÜLA ?**

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?



June 27, 2021 nü Leh nung Defence Minister, Rajnath Singh-i LAHDCs, Kargil, Leh aser sorkar ketdangsertem den senden amendang noksa nung angur.

### India nung anonisung 50,040 dak Covid putet aser 1,258 asü

**New Delhi, June 27 (Agencies):** India nung anonisung 50,040 dak coronavirus putet aser iba tashidak agi nisung 1,258 süogo, ta Amongnü anepdang Union health ministry-i metetdaksü. Coronavirus agi ano nisung 1,258 asüba sülen tang tashi nungbo linük nung iba tashidak agi asür 3,95,751 jungogo, ta health ministry-i metetdaksü. Tang tashi nung linük nung nisung 3,02,33,183 dak

coronavirus putetogo aser tang teshirangdakpur 5,86,403 dang kümogo. Tanü agi anogo 45buba linük nung anogo shia iba tashidak putetba dang nungibo iba tashidak agi shiranger anepertem timba; tang tashi nung iba tashidak agi shiranger 2,92,51,029 anepogo aser iba tashidak agi shiranger asüba shilem 1.31 dang kümogo. Linük nung iba tashidak agi shiranger anepba shilem 96.75

kümogo aser hopta shia coronavirus positive putetba shilem 2.91 dang kümogo. Tesüiba ghonda 24 tsüingda linük nung coronavirus vaccine dose lakh 64.25 agütsüogo aser tang tashi nung dose ajak agi crore 32.17 agütsüogo. Honibarnü samples 17,45,809 tendanga liasü aser tang tashi nung samples ajak senteper 40,18,11,892 tendangogo, ta Amongnü ICMR-i metetdaksü.

### Covid Vaccine dak sendakba olulu mamangtsüla: PM Modi

**New Delhi, Aami/June 27 (Agencies):** Amongnü Ato kilonser, Narendra Modi-i nüburtem dang, coronavirus vaccine dak sendakba olulu mamangtsüla aser iba vaccine agitsü atema marendaktsüla, ta mepishia metetdaksü. Kütsü künaprongla coronavirus vaccine agiogo, ta shia pai linük nüburtem dang science aser scientist tem dak melung kateta vaccine agitsüla, ta mepishi. "Ni nenok dang science dak melung alemtsü mepishir. Asen scientist tem dak melung alemtsü mepishir. Nisung aikati vaccine agiogo. Ni-a dose anaprongla agiogo. Kütsü küm 100 ajungtsü mapang ana nung lir, aser la-a dose anaprongla agiogo. Yimlibilema vaccine

dak sendakba olulu kecha mamangtsüla," ta pai mepishia metetdaksü. Vaccine agiba ajanga dang iba tashidak tamajung nungi jenbua alitsü, ta pai ashi. Ato kilonseri ita shia radio ajanga nüburtem den jembiba sentong 'Mann Ki Baat' nung jembidang pai, "Coronavirus amokmeren tang tashi lir, anungji asenoki vaccine agitsüla aser maneni covid telatetbatem beshitsüla," ta ashi. India nung Delta variant ama coronavirus variant balala putetba mapang ka nung Modi-i nüburtem dang vaccine agitsü mepishir. India nung tang tashi nung nütsüng tasadang dak timbai vaccine ano magi. Tang tashi nung tain nütsüng shilem 5.6-i

dang vaccine agiogo. Modi-isa June 21 nü Centre sorkar vaccination sentong tassenba tenzükba anogo kija nung nisung lakh 80 nem vaccine agütsüba atema doctor tem aser nurse tem densema healthcare workers ajak nem tenüngsang agütsü. Mann Ki Baat sentong nungsa pai nüburtem dang, tzüngluruwa mongpu tenzükogo, anungji tzünglu tzü wazüka ayutsüla, ta mepishi. Ato kilonserisa India nungger saisaponger, asür Milkha Singh nem akhüm agütsü. Taoba mapang National volleyball captain, Singh ita ka shi coronavirus tashidak agi shiranga aruba sülen Chandigarh nung aliba hospital ka nung tan ita süogo.

### Jammu Airport nung bomb ana apok

**Jammu, June 27 (Agencies):** Amongnü anepdang züingia Jammu Airport nung aliba high security technical area nung bomb ana apok, ta ketdangsertemi metetdaksü. Mezüingbuba bomb ji anepdang 1:45 ako meta building kilem nung apok, iba sülen minute 5 dang lir tanabuba bomb ji ali nung apok. Iba lendong nung IAF sepai ana yiru. Osangbener den jembidang Jammu & Kashmir Director General of Police, Dilbag Singh-i, bomb ji kiralongrartemi pokdaksü aser tang police, IAF den tanga agency temi iba tatalokba bushisüingdang tenzükogo, ta metetdaksü.

Indian Air Force (IAF)-i twitter ajanga, "Bomb apokba ajanga osettsüset kecha meraksa. Civil agencies den senteper IAF-i bushisüingdang tenzükogo," ta metetdaksü. Chief of Air Staff, Air Chief Marshal, RKS Bhadauria nem iba osang metetdaksüogo. Tang pa Bangladesh-i oa lir. Defence ministry-i twitter ajanga, "Tanü Jammu nung aliba Air Force Staion nung tatalokba atema Defence Minister@rajnathsingh-i Vice Air Chief, Air Marshal HS Arora den jembigo. Iba tensa asadangtsü atema Air Marshal Vikram Singh, Jammu-i aotsü," ta metetdaksü.

### Chhattisgarh nung Maoists lenir ka khaset

**Dantewada, June 27 (Agencies):** Amongnü Chhattisgarh kübok Dantewada district nung mapang talangka nungi sepaitemi bushia aliba Maoists lenir ka khasetogo, ta police-i metetdaksü. Ozüing alema inyakba ken o 25 dak sendakba nung police-i pa bushia liasü aser pa apurtem nem senpet lakh 5 agütsütsü, ta sangdonger liasü. Amongnü nikonngang 12:30 ako meta Pordem nung aliba arem nung security sepaitem aser telungpurtem na tsüingda khatepba mapang nung pa khaset. District Reserve Group (DRG)-i Maoists telungpurtem mita aoba mapang nung

telungpurtemi tama injang kahloktsüba sülen telok ana tsüingda khatep tenzükba liasü. "Telungpurtem jena aoba sülen iba tesemji mita reprangba mapang nung security sepaitemi telungpur tasü mang ka den pistol ka densema oset aika angu. Telungpur asürji Malangir Area Committee nungi Santosh Markam lir ta jangjaogo. Pa apurtem nem senpet lakh 5 agütsütsü sangdonger liasü," ta Dantewada Superintendent of Police, Abhishek Pallava-i metetdaksü. Santosh anema Aranpur police station nung ken o 25 benoka liasü, ta paisa shisem.



June 27, 2021 nü Surat nung nungtugu businessman, Mahesh Savani-i AAP nung adenba mapang tangokba noksa nung angur. Kasa noksa nung AAP lenir aser Delhi Deputy Chief Minister, Manish Sisoda-a angur.

### UP nung AIMIM-i assembly menden 100 nung tokteptsü: Owaisi

**New Delhi/Lucknow, June 27 (Agencies):** Amongnü AIMIM tongti aser Hyderabad MP, Asaduddin Owaisi-i, 2022 Uttar Pradesh Assembly elections nung par party-i assembly menden 100 nungi tokteptsü, ta metetdaksü. Owaisi-isa, taruba election nung par party-i Suheldev Bharatiya Samaj Party (SBSP) tongti, Om Prakash Rajbhar aser pai tenzükba 'Bhagidari Sankalp Morcha' den lokteper tokteptsü, ta ashi. Twitter ajanga Owaisi-i, "Taruba UP election nung onoki menden 100 nung tokteptsü telemtetba agiogo. Party-i candidate tem shimba maparen tenzükogo," ta metetdaksü. "Onoki Om Prakash Rajbhar'er party Bhagidari Sankalp Morcha den lokteper

saka tanga party tem den lokteptsü atemabo mejembi," ta pai metetdaksü. AIMIM aser SBSP dak alia Bhagidari Sankalp Morcha nung tanga party ti densema lir, item rongnung Krishna Patel'er party Apna Dal, Jan Adhikar Party aser Chandrashekar Ravan'er party Azad Samaj Party densema lir. Yaküm Bihar Assembly elections nung AIMIM-i menden 20 nung toktep aser menden pongu nung takok ngua liasü. Ajisüaka tawa West Bengal aser Tamil Nadu assembly elections na nungbo AIMIM-i menden ka nunga takok mangu. 1019 küm Maharashtra Assembly election nunga AIMIM-i menden asem nung takok ngua liasü.



June 27, 2021 nü linük Tir, Ram Nath Kovind-i Kanpur Dehat kübok par yim- Paraunkh semdangba mapang tangokba noksa nung angur. Amongnü Kovind-i Dr B.R. Ambedkar nem akhüm agütsü aser Milan Kendra & Veerangana Jhalkari Bai Inter College semdanga liasü.

### Minister Fawad-i PM Khan pusema jemb

**Islamabad, Aami/June 27 (Agencies):** Ato Kilonser Imran Khan-i al-Qaeda tekolakba Osama bin Laden ya linük asoshi takum bendanga agütsür ka (martyr) ta ashiba ya aibelena adokba lir, ta Pakistan federal minister for information and broadcasting Fawad Chaudhry-i ashi. Geo News den sensaksema mapang Chaudhry-i, Pakistan-i Osama bin Laden ya kiralongrar ka aser al-Qaeda ya kiralongrar telok ka ama agizüker, ta ashi.

Taoba küm June ita Pakistan national assembly nung o jembiba mapang Imran Khan-i, 2011 küm US special forces-i Abbottabad nung tepsetsang bin Laden ya linük asoshi takum bendanga agütsür ka, ta shia liasü. "America nungertem Abbottabad-i arua Osama bin Laden tepsetba ajanga Pakistan nungertem koda mak asü, iba ya ni kodanga mamatsü," ta Khan-i ashi.

US Navy Seals-i Osama bin Laden tepsettsü atema

Operation Neptune Spear benoka inyakba indang Pakistan nem jelia osang magütsü. Alima nung tesem balala amaktsü atema asalendong balala yangluba atema Bin Laden aitsür liasü. Pai asayameyanga World Trade Center aser Pentagon amak.

Iba o jembizüka yokba sülen bin Laden ya linük asoshi takum bendanga agütsür ka ama züngshiba atema opposition lenirtemi Imran Khan kanga mejungi aija liasü. "Pai ozü linük raksatsü aser Khan-i pa dang linük asoshi takum bendanga agütsür ka ta ajar," ta taoba foreign minister Khawaja Asif-i Parliament nung Khan aija ashi.

Imran Khan-i al-Qaeda lenir indang jembiba olen ya küm ka sülen Pakistan foreign minister Shah Mahmood Qureshi-i TOLO News den sensaksema mapang ano temai adokogo.

"Pai jembiba o ya mashiymi agi. Media shilem kati ken o tamajungba küm daksü," ta Qureshi-i ashi.

### Dhaka nung lockdown tenzüksü lia nisung aika jena aor

**Dhaka, Aami/June 27 (Agencies):** Linük nung lockdown tesashi benoktsü lia nisung aika Dhaka nungi ainshitsü nükjidong nung rong anenba tesem sünga adenshi.

Hombarnü nungi tenzüka anogo tenet tashi Bangladesh nung ajungben rongdak nungdak dak alaka shinga pei ki yutsür aotsü memelatsü.

Iba yongji nüburtem yimtsüng aser jila balalai iba yimti yutsür aor.

Linük nung COVID-19 cases kanga sashia kumogo, aser timba kidanger linük, India nung mezüing jangjatetba Delta variant den sendaktepa lir.

Bangladesh nung tang tesüsaba wave ya hopta trok shi tejakdang tenzükü liasü. May 15 nü linük nung COVID-19 cases tasen 261 aser asüba 22 liasü. Hokulbarnü cases tasen 5,869 aser asüba nisung 108 liasü, koba coronavirus tenzükü anogoshi nisung süyonga aruba rongnung timtiba jenjang tanabuba nung lir.

Mozüki aika nung shiranger agi sünga lir, talisa India den arrtsülen tali tim atemer.

COVID-19 cases tali akumba ajanga rail aser bus services tem anenja lir, aser ajungben rongdak nungdak tem dang melar.

(Maneni tapak 9 nung...)



Peru linük nung tir atema election agir hopta ishika lir tir meden asoshi toktepsang, Pedro Castillo busema Lima, Peru nung nüburtem jajaba noksa nung angur. June 6 nü election agiba vote ajunga azüngba nung Castillo ya pa den toktepsang Keiko Fujimori dang nung temaba jenjang nung lir, saka election ketdangsürtemi ano vote ishika junga asadangshiba mapang lir, ta ashir.

### Thailand nung tenokdangba tasen agütsüshir

**Bangkok, Aami/June 27 (Agencies):** Thailand sorkari Deobarnü, linük yimtiba aser temeket nung aliba tesemtem nung tenokdangba tasen agütsüshiba metetdaksüogo. Coronavirus tashidak kanga kara prokshia aoba azüoktsü asoshi item tenokdangbatem agütsüogo.

Tenokdangba tasen ya Hombarnü nungi tenzükü anogo 30 benoktsü, kong Bangkok yimti aser temeket nung aliba province pongu nung restaurant nung chijemtsü asoshi tenokdangba agütsüba densema lir, ta linük royal gazette nung sangdongogo.

Bangkok aser province pongu nung shopping mall tem aonung 9 ako tashi nungbo shibangtsüla aser iba den benjungbentsü kecha ayongzükü agütsü memelatsü mesera nisung

20 tema adenshia sentong agütsü asoshi memelatsü, ta kasa sangdong ajanga metetdaksü.

Maneni tesem trok nung kisüjensü maparen sota atatsü aser tashidak menatepa aoba nokdangtsü atema mapa inyakertem indang camp mokdanga ayutsü. Linük yimtiba nung mapa inyakertem amungba camp tem nung tashidak keta alir aika potetba sülen iba tetuyuba agütsüogo. Linük yimtiba nung tang ki asüba maparen tesem 575 nung inyakdar, kong mapa inyaker 81,000 shi sendaka lir.

May ita nungi tenzükü tang tashi nung Bangkok kübok iba amala mesükba camp tem nung clusters 37 potetogo.

Kasa mapang nung ketdangsürtemi Bangkok aser tanga province pongu nung

senzüsenpong nokdangtsü aser kisüba maparen nung sodaka alirtem tanga tesemi anir aotsü asoshi checkpoint tem amenoktsü. Iba den linük kübok Malaysia anasa aliba province pezü nunga checkpoint amenoktsü, kasa sangdong ajanga metetdaksü.

Iba osang sangdongba sülen Deobarnü anepdang Twitter ajanga nüburtemi mapang atakzüksüba dak sendakba nung temulung masüba lemsatepogo aser iba jenjang agiba ya imlaa maliba ka ta ashi.

Ato Kilonser Prayuth Chan-ocha-i Hokulbarnü sangdong ka ajanga, pai lockdown ta asüba ojang ya takok tashi mamshiner ta ashiba den tashidak menatepa aoba nokdangtsü atema shishilemba kar aser inyakyim kar nem tenokdangba agütsütsü, ta ashi.

### Florida ki chirepba nung tang tashi nisung 156 samar bushir

**Surfside, Aami/June 27 (Agencies):** Anogo asem tejakdang Florida nung nisung aliba ki ka chirepba nung alir nisung 150 dak tema bushitsü atema Deobarnüa maparen balala inyaker, aser iba ki talang yangluba nung temolung malem adoka lir.

Miami anasa Surfside tesem nung iba lendong atalokdak emergency worker temi Honibarnü nisung tasümgang ka nguteta iba lendong nung asür ajak agi nisung pongu kumogo, ta Miami-Dade County Mayor Daniella Levine Cava ajanga nikongdang osangbener senden ka nung metetdaksü.

"Asenok asoshi tongtipangtiba mapaji nisung ka danga kumzüküteter asü masü ta lir," ta Levine Cava-i ashi.

Yangji mapa inyakertemi nisung temang shilema kar ngutet, asür asem jangjatet kinunger nemo sang agütsüogo, ta lai ashi.

Nisung 156 shi takum alitsü temila lir, ta ketdangsürtemi ashir. Honibarnü firefighter temi



Surfside, Florida nung Brehostibarnü chirpba story 12 atongtepa aliba Champlain Towers South nung South Florida Urban Search and Rescue team ajanga nisung bushiba noksa ka yangi angur. Iba lendong nung tang tashinung asür ajak agi pongu jangjaogo aser ano nisung 150 dak tema samar bushir.

küm 40 tejen ki chirepa mi aser mokozi adoka aliba telungleni lutet, ta ashi.

Azü, infrared scanning aser hadir tulu amshia bushiba mapang jana telung nung nisungtem takum alitsü imlar, ta tekumzükü temi ashi.

"Tang ajak dang tulutibaji

teimla lir. Ibaji agi onok anir. Iba tensa ya kangasa majung lir," ta Fire Chief Alan Cominsky-i ashi.

Story 12 atongtepa tua aliba ki tamendak dak gari anena ayutsü tesem yanglua alidak engineer temi tongshi kar kanga mejungi raksar aliba kuli ngutet, ta 2018 indang report ka ajanga

sayur.

Iba ki ya taküm yanglushitsü atema condominium board nem report ya agüja liasü, ta osang ajanga ashir.

Iba report nung shia aliba aser Brehostibar anepdang 1:30 ako (par mapang) meta iba ki laoba sendaktepa ali asü maliar


ano mejanja.

Champlain Towers South nung condo association den okatsür inyaker Donna DiMaggio Berger-i ashiba agi, 2018 report nung shia aliba yago ki tejen nung teti ajuru aser condo board züngsemtem nemo sang magütsü, shirnok iba kidang kinungertem den külemi alir.

Iba ki yanglushitsü atema board ajanga sen million \$12 apur liasü aser ki kibur shia dang sen \$80,000 menoktsü ashi, ta laisa ashi. Yipru tesashi aru metenzükdang kilen yanglushiba maparen tenzükü liasü aser concret mapa atema board ajanga bid tem bendena liasü, saka tashidak wara mechi maparen atsidaka liasü, ta lai ashi.

1990s mapang satellite data ajanga sayuba nung iba ki ya küm shia millimeter ka nungi asem tashi telungi atsüoka ia liasü, saka temeket nung aliba ki bo shidak nokdaka liasü, ta Florida International University professor Shimon Wdowinski-i ashi.

# Pankaj Tripathi-i NCB yaritsü



**New Delhi, Aami/June 26, 2021**

**(Agencies):**

"International Day Against Drug Abuse and Illicit Trafficking" anogomung nungtem nung, Honibarnü actor Pankaj Tripathi-i Narcotics Control Bureau (NCB) nungita yaritsü nangzükogo.

Pankaj-i ashiba agi, NCB Patna Zonal Unit nungi tekolakpurtem kü den ajurutepego.

"Temesepba mozü beshiba anema nokdaksü aser iba dak sendakba nung sentong balala ajanga Bihar nung alir nübun dang tekümdangtsü osang sangoktsüsü asoshi NCB Patna nungi tekolakpurtem kü den

ajurutepe liasü aser iba ama campaign aser awareness drive atema ni yaritsü mulunga aliba parnok den lemsatepogo," ta Pankaj-i ashi.

Pankaj-i ashiba agi, nübun ajungtsü asoshi iba maparen nung shilem agitsü ya tebilemstü aser khuret ama lir.

"Lanurtemi jangraba/sapuba rongnung cinema ya lir aser actor ka ama asenok longjemer awareness campaign ayonga agira, lokti nung temelenshi tulu adoktsüsa, iba jagi nübun aika den jembitsü akok. Actor ka ama iba ya lokti atema tebilemstü tuluka lir ta nibo bilemer aser India senso ka ama nia akokba tashi agi iba

mapatong nung nungita yaritsü mulunga dang lir," ta Pankaj-i shisem.

Acting maparen tsütsü, Pankaj-i pa indang taruba film tem atema renemdar. "83" nung pai shilem agiba angutsü aser iba film yakta sayatsü sentong lir. Iba film ajanga, 1983 küm India tebur Cricket team-i mezüing Cricket World Cup takok anguba otsü sayatsü. Iba film nung, Pankaj-i team manager, Man Singh ama shilem agiogo. Kasa film nung Ranveer Singh-i taoba mapang India team captain, Kapil Dev shilem agiba angutsü.

Iba film dak alaka, Pankaj-isa Akshay Kumar den "Bachchan Pandey" nung külemi shilem agitsü. Iba film ya Jaisalmer, Rajasthan nung tangok tenzükogo.

Farhad Samji-i direct asüba film nung Arshad Warsi, Jacqueline Fernandez, Kriti Sanon aser Prateik Babbar nungeri tongti shilem agitsü.

Ano, Pankaj-i Kriti Sanon den "Mimi" film nung shilem agiba angutsü.

# Tetsür kati sen lakh 1.2 yong teti 12 ayok

**Mumbai, Aami/June 27, 2021**

**(Agencies):** Jamshedpur nungi arishi küm 11 tain tetsür ka mangdang (smartphone alitsü) ataloktsüsü aser online class agidaksütsü atema Mumbai nungi nisung kati la nem teyari agütsü. Tulsi Kumari, shibai lenmang tezülen teti (mangos) yoka amener, Ameya Hete-i la dang nungi teti ka atema sen 10,000 agüja sen lakh 1,20,000 yong teti 12 alizükba mapang la kanga aoksa liasü.

Tetsür la dang nungi alizükba teti sen ya, Bodhbarnü Ameya-i la (Tulsi) tebu Srimal Kumar indang account nung transfer sütsü.

Senotsü peria maliba ajanga Kumari timtem ajangshiba osang News18 Lokmat Digital ajanga metetdakja liasü. Iba osang angashia, Tulsi nem

smartphone ka alitsütsü aser online class maneni agidaksütsü atema, Mumbai nungi businessman, Ameya Hete-i sen lakh 1.2 yong la ket nungi teti 12 alizük. Pai (Ameya) Tulsi nem sen 13, 000 alang smartphone ka agütsü aser iba den külemi lai online ajanga shisaliok angazükdang mepetmesü timtem kecha malitsü atema, pai küm piyong atema Internet recharge taa menoktsüogo.

News18 network pur temulungtetba tulu aliba ajanga, Jharkhand nung Tulsi aliba yimtsüing tashi tsüingdong oagi la den ajurutepe liasü. Tulsi Kumari-i phone anguba ajanga pelaba parnok den lemsatep aser tang nungi tenzük lesson meranga bushitsü, ta lai ashi.

Tulsi tebu Srimal-i, tesayuba tajung agüja aser lenmang

shitak nung par jala anitetsü jangraba lemsatep. Ano külen, Tulsi tetsüi, yimdong nung la teti yoka amentsü kanga memulungi aliba lemsatepe liasü. Ajisüiaka, Ameya teyari ajanga, Tulsi shisaliok bushiba wadang tsütsü tetsükdaksü majurutsü imlar.

"Tulsi ya kanga dang teyakyak aser meranga inyakba kaketshir ka lir. Onoki agütsüba teyari ajanga lai kaketsü bushiba tsütsü takok ngua ora, ibaji onok atema tepelatsü. La nungdakba mapang, onoki la maneni yaritsü," ta Ameya Hete-i ashi.

Coronavirus lockdown ajanga class aser school nung temelenshi tuluka adokdaksüogo aser reju ajak nung online ajanga tesayuba agütsütsüsa küm adokba yong, India nung digital sabang tsütsü ongdang tuluba küma odar.

# 'The Vaccines'-i kensep pungobuba sangdongogo

**New York, Aami/June 27, 2021**

**(Agencies):** British kentener telok, The Vaccines puri taküm tatemlen 'Back In Love City' ta nungja agütsüba kensep pungobuba sayatsü terenemba lir.

'If You Wanna' kentener telok yagi 2018 indang 'Combat Sports' kensep den tatongtep ka sayatsü sangdongogo aser September 10, 2021 nü parnoki kensep tasenba sayatsü asadangdar. Iba telok nung, ken atensang, Justin Young-i, kensep tasenba dak sendakba nung lemsatepe liasü.

Pai ashiba agi, Los Angeles nung tensa ka ajangshiba aser iba den külemi Ridley Scott indang 'Blade Runner' film ajanga iba kensep yanglutsü ajungmeso.

The Vaccines-i iba record nungi track ka den LP ka sayaogo, koba taoba küm tetenzüklen renema liasü. Iba ken aser LP ya Daniel Ledinsky ajanga produce asü. Taoba mapang, Daniel-i Rihanna aser Tove Lo na den longjemer inyakba ajaki jangjaa lir.

Iba Kensep dak sendakba tanga maparen atema, kentener teloki Andrew Maury (Lizzo, Post Malone) den külemi inyakogo. Ano külen, additional production atema Fryars (Pharrell Williams, Mark Ronson) nungi teyari agütsüogo.

Taoba küm March ita, Justin-i collection ka tease süa liasü, koba Freddie Cowan, Árni Árnason, Timothy Lanham aser Yoann Intonti nung den longjemer yangluogo.

"The Vaccines indang kensep tasenba ya taoba dang nungi balaka alitsü aser onoki iba ama kodanga inyakdanga mali. Iba record angartemi iba kensep pelashishia agizüktsü aser angatetsü imlar," ta pai ashi.

\* **'Back In Love City' tracklist:**

1. 'Back In Love City'
2. 'Alone Star'
3. 'Headphones Baby'
4. 'Wanderlust'
5. 'Paranormal Romance'
6. 'El Paso'
7. 'Jump Off The Top'
8. 'XCT'
9. 'Bandit'
10. 'Peoples Republic Of Desire'
11. 'Savage'
12. 'Heart Land'
13. 'Pink Water Pistols'

# TXT - Tomorrow X Together-i ken tasen ka saya



**New Delhi, Aami/June 27, 2021**

**(Agencies):** K-pop indang generation pezübuba "It boys", Tomorrow X Together, shirnok dang TXT ta ajar, iba teloki "0X1=LOVESONG (I Know I Love You) ta nungja agütsüba remix ken ka sayaogo. TXT den pH-1, Woodie Gochild aser Seori longjemer iba ken tenogo.

Ken tasenba ya "The Chaos Chapter: Freeze" indang remix ken ka alitsü, koba Billboard 200 nung top five tongteta liasü. Iba original track, "0X1=LOVESONG (I Know I Love You) feat. Seori" ya temeyoktep pop rock ken ka lir aser artist Seori sempet ajanga iba ken tepor junga yangluogo.

Billboard 200 chart nung number 5 mezüing tongtetba den bendenloksema, TXT indang

original ken ajanga Billboard's World Digital Song Sales chart, Global 200 Excl. US aser Global 200, besides Spotify's Global Top 200 nung jenjang balala ajangzükdetogo.

Iba remix tasenba ya original ken dang nungi balaka alitsü, kong acoustic guitar, bass, electric guitar aser electric keyboard tem amshia yanglua liasü. Kasa mapang, Korean rappers pH-1 aser Woodie Gochild napronglai tasa balala amshia iba ken yangluogo.

TXT nung par pezü - Soobin, Yeonjun, Beomgyu, Taehyun aser Hueninkai dena lir. May 31, 2021 nü par teloki kensep tanabuba - "The Chaos Chapter: Freeze" saya liasü. Iba kensep nung band indang mezüing English ken "Magic" densema track 8 tashi lir.

# Dhaka nung lockdown... (Tapak 8 nungi...)

Nübun senzüba garitem shibangba ajanga nübuntemi yimti yutsür aotsü teimla nung nija gari hire asür mesüra tetsüing agi jajar.

Sorkar, semi-government aser nija office ajunga shibangtsü, ta Bangladesh indang Press Information Department (PID) ajanga osang ka sangdong.

Iba lockdown yagi tajangzük ajema angur aser anogoshi aayanglen senzürtem tali tim

atemtsü, ta osangbener kati ashi.

Lockdown oziung amshitsü aser nübuntemi kidang nungi ayazükba nokdangtsü atema police aser arrtsü anükertem yoktsü, ta health department odongtar, Robed Amin-i osangbener dang ashi.

Nungdakra mitkartema yoktsü, ta paisa ashi.

"Tensa kanga majung aser lendong tulu keta lir. Asenoki tang mazüoktetra India ama tensa ajurutsü," ta pai ashi.

## SANGDONGER

Asür Sentikaba Longchar Süngratsü, asüba anogo 2-6-2021 nungi 27-6-2021 tashi kinungertemi atasaogo. Anungji, 28-6-2021 nungibo sentsüh atema shirnok arudir kinungertemi magizüktsü ta sangdonger.

IN THE COURT OF  
PRINCIPAL DISTRICT & SESSIONS JUDGE  
MOKOKCHUNG, NAGALAND

S/C No. 59/2021

### NOTICE

**NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-I OF INDIAN SUCCESSION ACT 1925.**

Whereas application under Succession Act 1925 for grant of Succession Certificate for the estate/pension benefits of **Late Imsutoshi** has been applied by **Smti. Tamsunaro** W/o. **Lt. Imsutoshi** R/O. **H.No. 67 Patizung Ward, Tuli**, Mokokchung, Nagaland for possession of : **Closing of A/C.**

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of **20.5.2021.**

Given under the hand and seal of the court on this the **20.4.2021.**

Principal District & Sessions Judge  
Mokokchung : Nagaland.

## Euro 2020: Denmark aser Italy na quarter final-i iogo



Euro 2020 round of 16 nung Wales akokba sülen Denmark nung asayartem pelatepba noksa nung angur.

**Aami/June 27, 2021 (Agencies):** Honibarnü Euro 2020 round of 16 mezüngbuba asaya nung Denmark-i goal 4-0 agi Wales madak takok ngua quarter final-i iogo. Iba asaya nung Kasper Dolberg-i goal ana idakja par team nem takok angütsü.

Asaya Wales team-i kanga junga asayaa tenzük ajisiüka mapang tatsüka dang lir Denmark team-i asaya amokbanger asaya tenzük aser minute 27buba nung Dolberg-i mezüngbuba goal idaktsü. Mezüngbuba goal idaktsüba sülen Dolberg-isa tanabuba goal idaktsü aser Joakim Maehle o Martin Braithwaite natia goal kaka idakja parnoki asaya ayong ayonga akok.

Wales team asoshi tia maka asaya tatemtsü lia Maehle alangdaktsüba atema Wilson

nem red card agüja asaya nungi tugudaktsü.

Denmark team quarter nung Netherlands mesera Czech Republic den baku nung asayatsü.

Kasa asayamung tanga asaya ka nung Italy aser Austria na Wembley nung kanga toktepa asayaba sülen Italy-i goal 2-1 agi asaya kokogo.

Atakzükja aliba asaya mapang tembangba tashi nung telok kati danga goal midaktsüti asaya aruba sülen mapang apuloktsür asayaba mapang Italy team-i goal ana idakja parnoki asaya akok.

Italy team-i asaya junga metenzükter aser ball parnok ket nung meyteti asaya aser Austria-i parnok tsükdaktsütsü ama bilema aliba mapang ka nung Austria nung asayar Marco Arnautovic-i goal ka

idaktsü ajisiüka VAR-i iba goal magi kümdaktsü.

Asaya tanabuba shilem nung Mancini-i attack nung asayar pezü temelen yok aser Juventus winger Chiesa aser Atalanta midfielder Pessina na melenba tajangzük agia liasü.

Mapang apuloktsür asayaba mapang Chiesa-i minute 95buba nung mezüngbuba goal idaktsü aser iba sülen minute 10 lir Pessina-i tanabuba goal idakja parnoki asaya akok.

Austria asoshia asaya atemtsü minute trok anunga lia substitute Sasa Kalajdzic-i goal ka idaktsü saka parnoki tanabuba goal meküptokteti asaya makok.

Italy team tang agi asaya 31buba khen danga tamakok mongui asayaa arudar aser parnok quarter nung Belgium mesera Portugal den asayatsü.

## Yuvraj aser Gayle na Melbourne club nungi asayatsü akok

**Aami/June 27, 2021 (Agencies):** Chris Gayle aser Yuvraj Singh na taküm Australia nung Melbourne club ka nungi asayatsü akok. Melbourne nung amendaker aliba cricket club kati ashiba agi, taküm T20 asayamung atema Yuvraj Singh aser Chris Gayle na den tenangzüktepba yanglutsü ana nung lir ta ashi.

Mulgrave Cricket Club, shirnok Melbourne indang Eastern Cricket Association (ECA) third-tier competition nung asayar, parnokisa West Indies nung nungtu asayar Brian Lara aser South Africa nung AB de Villiers na dena sensaksem dar ta ashi.

Mulgrave-i, Sri Lanka nung asayar tejen Tillakaratne Dilshan aser Upul Tharanga na den tenangzüktepba yangluogo aser parnok head coach Sanath Jayasuriya lenisüba nung asayatsü.

Mulgrave tir Milan Pullenayegam-i, taoba mapang

India nung all-rounder Yuvraj and West Indies nung asayar Gayle na den tang sensaksem dar ta ashi.

"Onoki Dilshan, Sanath aser Tharanga den tenangzüktepba yangluogo, aser tang ano asayar kar den tenangzüktepba tembanga yanglutsü atema jembishinüdar," ta Pullenayegam-i 'cricket.com.au' dang ashi.

"Onoki tang Chris (Gayle) aser Yuvraj na den sensaksem dar aser sensaksem shilem 85 nungi 90 shi tembangogo. Ken o kar tembanga jembishinütsü lir saka sentong takok ngua odar," ta pai ashi.

Tir-isa, nungtu asayartem alizüktsü atema club-i sponsor timba anisemtsü merangdar, ta ashi.

"Sentong takok ngua inyaktsü atema onok nongita yarir tajung lir, saka onoki iba ya breaking even ka dang mesüdaktsüner, onoki lokti nem

meyipa agütsüner aser club structure atsülangshiner.

"Inyakyim metembangir, kechiyong nungtu asayartem anir aruba den maparen aika sendaka lir. Parnok senzüsenpongtsü, tanendak, chiyongtsü amala tenüngdakbatem agütsütsüla, anungji maparen aika anungdaka lir.

"Onoki parnok onok indang sponsor tem den sendaktepdaktsüner aser parnoki club aser sponsor tem nem langkabo meyipa agütsütelir magütsütelir repranga atadi. Iba dak sendakba nung parnok den tang sensak semdar," ta pai ashi

ECA T20 Cup nung knock-out masaya tsüngda preliminary asaya asemsem asayatsü, koba November nungi February tashi asayatsü.

Website ajangsa, bendanger asayartem asaya ka mesera ana nung dang asayatetsü ta metetdaktsüogo.

## World Cup Stage 3 nung India nung asayartem gold medal ana angu

**Aami/June 27, 2021 (Agencies):** India tsür recurve team nung Deepika Kumari, Ankita Bhakat aser Komalika Bari nungeri Deobarnü World Cup Stage 3 nung gold medal nguogo. Final asaya nung parnoki Mexico team koka liasü.

World Cup first stage final nung ama Deepika, Ankita aser Komalika nungeri Mexico tsürtem 5-1 agi koka liasü, ajisiüka taoba hopta Colombia makokba sülen Tokyo Olympics atema parnok qualify mesüet.

Taküm World Cup nung parnok anabenbuba atonga gold medal nguogo aser ajak senteper India tetsür team-i WC troben koka lir (Shanghai-2011, Medellin-2013, Wroclaw-2013, Wroclaw-2014, Guatemala City-2021). Asayamung ajak nung Deepika asayaa liasü.

Ita ana tejakdanga parnok

asemi Guatemala nung kasa team koka liasü aser Deobarnü final asaya nunga mezüngbuba set nung pa aseme point 10 nung pezüben kashia score 57-57 liasü.

Tanabuba set nung parnoki point 52 dang nguteta point asem agi tamakok angu, ajisiüka tasenbuba set nungbo parnoki point 55 angu aser asaya akok.

Kasa asayamung nungsa Deobarnü Atanu Das aser Deepika Kumari nati tarep temeyoktep asaya nung gold medal nguogo. Deepika aser Atanu nati 0-2 agi tamakok ngua aliba nungi meyipa atur Netherland nung tarep Sje van den Berg aser Gabriela Schloesser 5-3 agi koka liasü.

Honibarnü asaya nunga India nung asayar Abhishek Verma-i compound individual event nung India atema gold medal ka koktetogo.

## Serena Williams Tokyo Olympics nung masayatsü



**Aami/June 27, 2021 (Agencies):** Honibarnü osangbenertem den sensaksem ba mapang Serena Williams-i, la Tokyo Olympics nung shilem magütsü ta shiogo, ajisiüka iba telemtetba agiba kuli magütsü.

"Ni Olympics indang list nung mali.. Ni mejangja..list nung lira ni malitsüla," ta Williams-i ashi

Arishi küm 39 tain Williams-i, Olympics nung United States atema kija asaya aser tarep asaya nung gold medal pezü koktetogo. Lai 2012 London Olympics nung kija aser tarep asaya anaprongla nung gold medal ngua liasü. Lai 2000 Sydney Olympics aser 2008 Beijing Olympics nunga tarep asaya nung gold medal nguogo.

Tarep asaya nung gold medal ajak ya teyi Venus den kokteta liasü.

2016 Rio de Janeiro Games nung Serena Williams kija asaya tasembuba rounng nung Ukraine

tsür Elina Svitolina-i tsükdaktsü aser tarep asaya nung mezüngbuba round nung tsük. Iba asaya masü dang la Olympics tarep asaya nung 15 ben tashi khen danga tamakok mongui asayaa liasü.

Taküm Olympics nung masayatsü ya koma bilemer ta asüngdanga mapang Williams-i, "ni iba indang kechi mebilemdang. Taoba mapang iba asayamung ya kü atema jangrademtsüka liasü. Ni iba indang kecha mebilemdang aser mebilemstü," ta langzü.

Nungtu tennis asayar Rafael Nadal aser Dominic Thiem nungeria July 23 nü nungi tenzüktsü aliba Olympics nung shilem magütsü atema telemtetba agiogo.

Kasa mapang nung Roger Federer-ia, Tokyo Games asayatsü asoshi tang tashi telemtetba magi lir, ta Honibarnü ashi. Wimbledon nung asayaba sülen telemtetba ka agütsü, ta pai ashi.

**BILEMDANGANG**

**"Jembiba ama libaliro agi liteta sayuang."**